

"Piep zei de muis en weg was Joep"

Nel sa unda Joep a bay cu 10 miyon di belasting?

ORANJESTAD (AAN) Awor cu a bin sali afor cu e miyonario Hulandes Joep van den Nieuwenhuizen doño di Tierra del Sol a baha na awa bay biba na Zwitserland pa motibonan fiscal (asuntunan di belasting) y financiero, e pregunta ta bin pa dilanti unda e 10 miyon di debe di belasting a keda cu Tierra del Sol y Joep mester paga a keda?

Un director di Utilities tambe ta baha na awa despues cu placa a desaparece den Utilities y te awe e tambe ta den exterior y ningun hende sa unda supuestamente e persona ey cu debe pais Aruba placa ta y awor ta toca turno na Joep kende tambe a baha na awa y laga pueblo di Aruba cu un debe miyonario atras.

Dia cu DIARIO a publica cu Nel Oduber como prome ministro a "Fix" pa Joep van den Nieuwenhuizen por lo pronto paga solamente 1 miyon di e debe di 10 miyon na erfpacht di Tierra del Sol, Nel a rabia y a bira onsportief y a bay menciona durante conferencia di prensa te hasta number di director di DIARIO kende no tabata tin

nada di haci cu e asunto di Joep y Tierra del Sol.

Un yiu di tera no ta haya e mesun privilegio cu Joep a haya pasobra diferente compania local a haya departamento di Belasting riba nan dak y nan mester a paga mesora of si no fono y ora cu e fixmento pa Joep a sali den publicidad, pueblo y sigur comercio a reacciona mesora cu masha hopi critica riba e forma di proceder di prome ministro Nel Oduber den asunto di fixmento di pago di belasting.

Awor tanto pueblo como comercio na Aruba kier sa si Nel sa unda Joep a bay cu e 10 miyon cu el a keda debe pueblo na belasting di Erfpacht.

Gobierno di Aruba a laga screen esnan cu a cumpra Tierra del Sol despues cu e proyecto aki tabata den problema serio?

Nan a cana kibra cu un sudafricano kende no tabata ni por a drenta Merca pa motibo di estafa of asuntunan contra ley y e persona ey por

a bin haci negoshi na Aruba sin cu un solo alma den gobierno tabata sa su background y ora cu prome ministro a bay deal cu Joep pa fix asunto di belasting pe, nan no a laga screen Joep prome?

Unda MOT cu LOT a keda pa a screen Joep pasobra Arubianonan ta wordo controla di ariba te abao ora cu nan bay banco pa haci transaccion di placa, pero Joep por a cana kibra na Aruba, haci negoshi y te hasta yega na areglo cu Nel ta bay fix asunto di belasting pe y awor Joep mes a baha na awa y piep zei de muis in het grote huis pasobra Joep no te tey mas.

Den e caso aki no por wordo bisa cu prome ministro por bay bisa pueblo e siman aki cu Joep komt zo pasobra por lo pronto nos no lo wak cara di Joep mas den e region aki pasobra na Curacao ta lista largo di hende y compania a presenta pa haya placa relaciona cu bancarota di compania di Joep na Curacao e y e mesun compania aki ta doño tambe di Tierra del Sol na Aruba.

Boicot contra Dokter Arubiano

ORANJESTAD (AAN) 'Poco hende por a pensa durante eleccion cu e gobierno di MEP lo bay contra nos propio yiunan di tera den seno medico y si pueblo en general tabata sa of lo por tabata tin e minimo sospecho kico lo wordo haci cu AZV y tambe e boicot grandi cu lo bay tin contra nos docternan local, anto MEP hamas y nunca lo a logra yega na stoepi di Bestuurskantoor'.

Esey ta reaccion cu DIARIO a haya for di pacientnan, famianan di esnan cu ta traha den seno medico y tambe for di famianan di esnan cu ta studiando den exterior pa bira dokter.

'Con bin un dokter Cubano (te con leu por yama nan dokter) kendenan no sa mes con pa traha cu aparatonan medico, ta wordo permiti pa traha como dokter na Aruba anto nos yiunan di tera cu a gasta balente placa pa por a studia den exterior no por traha na Aruba pasobra e ministro di Salubridad Publico ta aplica regla y ley manera cu e ta haya ta bon?'

Asina tambe tin un caso hopi tristo di un yiu di tera kende a studia na Colombia pa bira dokter y despues a traha na Aruba pa reemplaza diferente dokter local y a traha tambe na Eerste Hulp na Hospital, a traha na Merca na 4 diferente hospital grandi renombra, te cu awe no ta wordo permiti pa traha na Aruba pasobra un supuesto caso di 'Rural' cual ta un stipulacion di Colombia unda el a studia ta stroba na

e por haya su licencia como dokter na Aruba.

Ta trata aki di e caso di dokter Franca kende a wordo bringa formalmente door di e gobierno actual y te awe ningun hende sa e motibo tras di cortina pakico e gobierno di MEP ta contra e yiu di tera aki y cu e no por traha pa su pueblo mientras cu ta sigui permiti docternan di tur otro pais bin traha na Aruba y cu te hasta tanto ministro Booshi Wever como Prome ministro Oduber ta papia di bin cu docternan di Brazil pa Aruba.


Pa docternan Cubano excepcion a wordo haci pa nan por traha na Aruba pasobra diplomanan di Cuba no tabata valido na Aruba, pero awor ministro Booshi Wever ta nenga docternan Arubiano cu a studia na Colombia pa nan por traha na Aruba si nan no a core stage den areanan caminda cu gueriya ta mata hende manera bichi tur dia.

Si esaki no ta un berguensa nacional anto ta con e por wordo yama anto?

Mas tristo den henter e asunto aki ta cu e famia di e dokter aki ta un di e promenan cu tabata para banda di Betico tempo cu MEP a wordo lanta y un biaha mas palancanan di MEP mes ta wordo bringa door di nan mesun gobierno y sin cu esnan cu a bira victima, te awe sa pakico nan ta wordo persigui.

Keda pendiente pa e caso aki pasobra ta hopi informacion tin cu sali ainda!

NA PIA DI TRABAO!!



BEST DEAL

Tel: 5827100

(Pariha di Aruba Bank, Paradera)

BEST SHOPPING DEAL

Turibana Plaza

Tel: 5865455

Tool Box
tur tipo

35% OFF

TELEFONNAN

DI DIARIO

582-6747

FAX

582-8551